

肥鄉縣志卷之十六

風俗

剛柔燥濕五方之地運不齊正變貞淫列國之民情無定非禮陶而樂淑難道一而風同通變雖取其宜民居德乃可以善俗因陋就簡居鄉者切莫積習之沿革薄從忠長民者宜為先路之導志風俗

土廣俗醇大率精急高氣勢

山堂圖考

冀合商羽端馱烈人聲健其泉辛以鹹

河圖

土產無珍人性質樸

盧毓冀州論

俗尚勤儉士習詩書民務耕桑

府舊志

肥鄉縣志

卷十六

風俗

一

其俗好義其人甚果

舊志

賈不遠行粟不久積近漸浮華好巫崇淫祀

前志

相見宴會多行跪拜並行並揖尚左

婚禮

初請媒許親次行定次下財筵會 前期女家過妝奩 親迎日婿馬前導婦輿後隨大張鼓樂至門拜天地行合巹禮三日謁祠堂具枕頂巾履見舅姑餽親屬婿偕往婦家拜婦之父母謂之謝親肥俗結親男過幼女過長姻不以時此大弊也

喪禮

初喪具含斂立告布於門內大書某人之喪旁列生卒年月
紳士家掛魂帛於柩上立錦緞金書銘旌於喪側門外懸紙
幡按歲多寡男左女右 行家祭 將出殯先書期門外親
有具賻莫銘旌 奠用牲禮賻用金錢 殯出沿街搭祭棚
親友送至墳與孝子孝婦收頭 題主 主安靈亭內鼓樂
導歸至家行虞祭 肥俗多停喪不葬兵亂時有被火禁者
此猶弊之大者也

祭禮

寒食掛紙錢添新土七月十五日薦麻穀十月朔送寒衣誕
日祭辰皆祭墓所 士大夫家不盡立祠堂奉神主於寢室

肥鄉縣志

卷十六

風俗

二

民間多畫祖宗昭穆圖供奉

賽神

春祈秋報在所不禁鄉人釀錢穀具牲牢張鼓樂演雜劇則
失古人吹豳鼓蜡之風矣

廟會

始於元盛於明其初仿日中爲市之意貿易牲畜貨物而已
後在賁緣爲姦諸弊百出矣會之最盛者南有趙王廟北有
漳河廟西有西韓之元君廟東有屯莊之元君廟以及蒼
天齊大寨城隍皆是也餘村尙多其盛衰則與時消息云

節序

元旦雞鳴起拜天地奠祖先內外尊卑親友交相賀五日方
掃地掬塵送大門外曰送五窮 立春前一日迎春東郊土
女傾城往觀有司設宴於公堂呈雜伎取春牛土泥竈糊春
餅切蘿蔔曰咬春 元旦女人埋罩籬於厠中十六日取出
糊紙爲衣着女服卜一年休咎甚驗曰請戚姑娘 上元節
以炷香塗門神目張燈放爆竹搭燈山鬧簫鼓男婦出遊曰
走百病二月二日以竈灰圍門垣曰禁蝎油煎麵餅 餽遺
曰薰油蜒 三月清明上墳插柳枝架鞦韆遊人踏青 四
月八日浴佛之辰設水陸醮 五月端午餽角黍白團簪艾
葉以五色絲繫小兒女手足飲雄黃菖蒲酒取蝦蟆噙京墨

肥鄉縣志

卷十六

風俗

三

陰乾塗毒瘡 六月六日曝書畫不出蠹 七月七夕女子
設瓜果於中庭穿針乞巧十五日掛紙錢於田畔謂之送地
頭錢蒸麵羊遺外孫 八月中秋餽瓜餅置酒玩月 九月
重陽賞菊送棗糕登高會飲十月一日酒食奠先塋製紙衣
燎墓側曰送寒衣 十一月冬至交相拜亦具酒食奠先塋
十二月八日合稻粟棗豆之類爲粥辟瘟曰臘八粥二十
四日祭竈除夕換桃符放爆驚鬼門糊黃紙錢掛葫蘆葱炭
壓打鬼棒於門限燎燧火圍爐守歲此日俗呼亂歲猶多嫁
娶此則肥鄉一歲風俗之大凡也